

Den unge mannen og breiflabben

Ein breikjefta sværing sikra Ole-Kristian Hellesøy hovudpremien under fiskefestivalen på Nautnes.

NAUTNES: – Det var ein lang og hard kamp, seier Ole-Kristian Hellesøy etter å ha kome i land med eit stort gap. Gapet låg rett nok i bøtta, Ole-Kristian brukte munnen til å smila.

– Åsj, kor stygg!

– Er den daud?

Kommentarane frå tilskodarane tyda på at breiflabb ikkje er dagleg kost for alle. Men for fiskaren sjølv finst det langt verre fisk enn breiflabb.

Tyngre enn venta

– Eg et gjerne breiflabb. Men ikkje i dag, seier han.

Ole-Kristian Hellesøy håpte på å dra i land sigeren for størst fisk under fiskefestivalen laurdag. I båten hadde dei prøvd å vega breiflappen, og kome fram til 9,6 kilo.

– Eg håpar å vinna, sa storfiskaren.

Då dommarane hadde sagt sitt, var vekta oppjustert til 10,4 kilo. Derved kunne Hellesøy dra heim til Hellesøy med tittel, breiflabb og eit gigantisk fjernsyn i premie. Men det var langt frå berre fisk det handla om på Nautnes, under den årvisse kombinasjonen av fiskefestival og torgdag.

Framifrå ver

– Dette var litt vanskeleg, sa Thomas Lossius.

Han prøvde seg på bogeskyting, og kunne konstatere at det er lettare på film. Andre stader var det pomiridning, hoppeslott, helikopterturar, kunststilling, forteljingar og mange bodar med sal av ulike typar krimskram. Veret spelte til fulle på lag med Nautnes denne laurdagen, og folk frå nært og fjernt fann roen i sola. Og dei fleste som kom i land etter fiskekonkuransen hadde hatt eit visst hell med seg. Dei kom i land med fulle fiskekår og tomme ølboksar. Størst Fangst av alle hadde Geir Inge Svelingen, med 46 fiskar. Og for ordens skull: Dagens minste fisk var på 100 gram.



Det ser kanskje ut som om breiflabben prøver å sluka Ole-Kristian Hellesøy. Men fisken gapte over for mykje ved Nautnes laurdag. – Åsj! Er du sikkert på at den er daud? kjem det frå fleire eldre, kvinnelege iakttagarar. Alle foto: Kyre Styve



Fire kattungar vart den store attraksjonen for Larissa (frå venstre), Sophie, Noah, Emma, Kristine, Celine og Mia. – Det var fem kattungar, men den femte vart tatt av ein måse, fortel Sophie.



Båten til Skjærgardsheimen var den mest folksame på heile fiskefestivalen. Det var eit yrande båtfiv i heile området, frå små gummibåtar til store skuter.



Dei som likar hestar betre enn fiskar fann seg og til rette på Nautnes laurdag. Det var ei rekke aktivitetar og mykje mat på torgdagen.



Thomas Lossius prøvde seg på bueskyting. – Vanskeleg, var dommen.



Mange båtar hadde funne vegen til Nautnes, og ikkje alle var like ivrige fiskarar. Her er fiskestengene bytta ut med trekkspel.